

大般若波羅蜜多經卷第五百五十

夜

大般若波羅蜜多經卷第五百五十

夜十

唐三藏法師

玄奘奉

詔譯

第四分空相品第十八之二



尔時善現便白佛言如世尊說諸行皆是分別所作從妄想生都非實有以何因緣此諸菩薩所獲功德無量無邊佛告善現如是如

夜十

一

是如汝所說然諸菩薩行深般若波羅蜜多亦說諸行分別所作空無所有虛妄不實所以者何是諸菩薩善學內空乃至無性自性空已觀察諸行無不皆是分別所作空無所有虛妄不實是菩薩摩訶薩如如觀察諸行皆是分別所作空無所有虛妄不實如是如



是便能不離甚深般若波羅蜜多如如不離  
甚深般若波羅蜜多如是如是所獲功德無  
量無邊具壽善現便白佛言無量無邊有何  
差別佛告善現言無量者謂於是處其量永  
息言無邊者謂於此中數不可盡具壽善現  
復白佛言頗有因緣色亦可說無量無邊受  
想行識亦可說無量無邊耶佛告善現有因  
緣故色亦可說無量無邊受想行識亦可說  
無量無邊具壽善現復白佛言何因緣故色  
亦可說無量無邊受想行識亦可說無量無  
邊耶佛告善現色性空故亦可說為無量無  
邊受想行識性空故亦可說為無量無邊具

壽善現復白佛言爲但色受想行識空爲一切法亦皆空耶佛告善現我先豈不說一切法皆空善現荅言佛雖常說諸法皆空而諸有情不知見覺故我今者復作是問佛告善現非但色受想行識空我說諸法無不皆空具壽善現復白佛言無量無邊是何增語佛告善現無量無邊是空無相無願增語具壽善見復白佛言無量無邊爲但是空無相無願爲更有餘義耶佛告善現於意云何我豈不說一切法門無不皆空善現荅言如來常說一切法門無不皆空佛告善現空即無盡空即無量空即無邊空即餘義是故善現一

切法門雖有種種言說差別而義無異善現  
當知諸法空理皆不可說如來方便說為無  
盡或說無量或說無邊或說為空或說無相  
或說無願或說無作或說無生或說無滅或  
說非有或說寂靜或說離染或說涅槃諸如  
是等無量法門義實無異皆是如來應正等

夜十

二

覺為諸有情方便演說夜十爾時善現便白佛言  
世尊甚竒方便善巧諸法實性不可宣說而  
為有情方便顯示如我解佛所說義者諸法  
實性皆不可說佛告善現如是如是諸法實  
性皆不可說所以者何一切法性皆畢竟空  
無能宣說畢竟空者具壽善現復白佛言不

可說義有增減不佛告善現不可說義無增  
無減具壽善現復白佛言若不可說義無增  
無減者則應布施乃至般若波羅蜜多亦無  
增減若此六種波羅蜜多亦無增減則應六  
種波羅蜜多皆無所有若此六種波羅蜜多  
皆無所有云何菩薩摩訶薩修行布施乃至  
般若波羅蜜多求證無上正等菩提能近無  
上正等菩提佛告善現如是如是布施等六  
波羅蜜多皆無增減亦無所有然諸菩薩摩  
訶薩修行般若波羅蜜多時方便善巧不作  
是念如是布施乃至般若波羅蜜多有增有  
減但作是念唯有名相謂爲布施乃至般若

波羅蜜多是菩薩摩訶薩修行布施乃至般若波羅蜜多時持此布施乃至般若波羅蜜多俱行作意并依此起心及善根與諸有情平等共有迴向無上正等菩提如佛無上正等菩提微妙甚深而起迴向由此迴向方便善巧增上勢力能證無上正等菩提夜十爾時善

三

三

現便白佛言何謂無上正等菩提佛告善現諸法真如是謂無上正等菩提善現當知諸法真如無增減故諸佛無上正等菩提亦無增減若菩薩摩訶薩數多安住如是真如相應作意便近無上正等菩提如是善現不可說義雖無增減而不退失真如作意波羅蜜

多雖無增減而不退失所求無上正等菩提  
若菩薩摩訶薩安住如是真如作意修行布  
施乃至般若波羅蜜多便近無上正等菩提  
第四分深功德品第十九

尔時善現便白佛言是菩薩摩訶薩爲初心  
起能證無上正等菩提爲後心起能證無上  
正等菩提若初心起能證無上正等菩提初  
心起時後心未起無和合義若後心起能證  
無上正等菩提後心起時前心已滅無和合  
義如是前後心心所法進退推徵無和合義  
如何可得積集善根若諸善根不可積集云  
何菩薩善根圓滿能證無上正等菩提佛告

善現於意云何如然燈時爲初焰能焦炷爲  
後焰能焦炷善現答言如我意解非初焰能  
焦炷亦不離初焰非後焰能焦炷亦不離後  
焰佛告善現於意云何炷爲焦不善現答言  
世間現見其炷實焦佛告善現諸菩薩摩訶  
薩亦復如是非初心起能證無上正等菩提  
亦不離初心非後心起能證無上正等菩提  
亦不離後心而諸菩薩摩訶薩行深般若波  
羅蜜多方便善巧令諸善根增長圓滿能證  
無上正等菩提具壽善現便白佛言如是緣  
起理趣甚深謂諸菩薩摩訶薩非初心起能  
證無上正等菩提亦不離初心非後心起能

證無上正等菩提亦不離後心非即如是諸  
心起故能證無上正等菩提如是諸心  
起故能證無上正等菩提而諸菩薩摩訶薩  
能證無上正等菩提佛告善現於意云何若  
心滅已更可生不善現對曰不也世尊是心  
已滅不可更生佛告善現於意云何若心已

夜十

四

生有滅法不善現對曰如是世尊若心已生  
定有滅法佛告善現於意云何有滅法心非  
當滅不善現對曰不也世尊有滅法心決定  
當滅佛告善現於意云何無滅法心爲可生  
不善現對曰不也世尊無滅法心無可生義  
佛告善現於意云何無生法心爲可滅不善

現對曰不也世尊無生法心無可滅義佛告  
善現於意云何無生滅法心爲可生滅不善  
現對曰不也世尊無生滅法心無可生滅義  
佛告善現於意云何若法已滅更可滅不善  
現對曰不也世尊若法已滅不可更滅佛告  
善現於意云何若法已生更可生不善現對  
曰不也世尊若法已生不可更生佛告善現  
於意云何諸法實性有生滅不善現對曰不  
也世尊諸法實性無生無滅佛告善現於意  
云何心住爲如心真如不善現對曰如是世  
尊如心真如心如是住佛告善現於意云何  
若心住如真如是心爲如真如實際性常住

不善現對曰不也世尊是心非如真如實際  
其性常住佛告善現於意云何諸法真如極  
甚深不善現對曰如是世尊諸法真如極爲  
甚深佛告善現於意云何即真如是心不善  
現對曰不也世尊佛告善現於意云何離真  
如有心不善現對曰不也世尊佛告善現於

夜十

五

意云何即心是真如不善現對曰不也世尊  
佛告善現於意云何離心有真如不善現對  
曰不也世尊佛告善現於意云何真如爲能  
見真如不善現對曰不也世尊佛告善現於  
意云何汝爲見有實真如不善現對曰不也  
世尊佛告善現於意云何若菩薩摩訶薩能

如是行是行深般若波羅蜜多不善現對曰  
如是世尊若菩薩摩訶薩能如是行是行深  
般若波羅蜜多佛告善現於意云何若菩薩  
摩訶薩能如是行爲行何處善現對曰若菩  
薩摩訶薩能如是行都無行處所以者何若  
菩薩摩訶薩能如是行都不見有能行所行  
行時行處諸現行法皆不轉故佛告善現於  
意云何若菩薩摩訶薩行深般若波羅蜜多  
時爲何所行善現對曰若菩薩摩訶薩行深  
般若波羅蜜多時行勝義諦此中一切分別  
無故佛告善現於意云何若菩薩摩訶薩行  
深般若波羅蜜多時於勝義諦爲取相不善

現對曰不也世尊佛告善現於意云何若菩  
薩摩訶薩行深般若波羅蜜多時於勝義諦  
雖不取相而行相不善現對曰不也世尊佛  
告善現於意云何是菩薩摩訶薩於勝義諦  
爲壞相不善現對曰不也世尊佛告善現於  
意云何是菩薩摩訶薩於勝義諦爲遣相不  
善現對曰不也世尊佛告善現是菩薩摩訶  
薩行深般若波羅蜜多時於勝義諦若不壞  
相亦不遣相云何能斷取相之想善現答言  
是菩薩摩訶薩行深般若波羅蜜多時不作  
是念我今壞相我今遣相斷取相想亦不修  
學斷相想道若菩薩摩訶薩精勤修學菩薩

行時修斷想道尔時一切佛法未滿應墮聲  
聞或獨覺地世尊是菩薩摩訶薩成就最勝  
方便善巧雖於諸相及取相想深知過失而  
不壞斷速證無相何以故一切佛法未圓滿  
故佛告善現如是如是如汝所說尔時舍利  
子問具壽善現言若菩薩摩訶薩夢中修空

夜十

六

無相無願三解脫門於深般若波羅蜜多有  
增益不善現答言若菩薩摩訶薩覺時修此  
三解脫門於深般若波羅蜜多有增益者彼  
夢中修亦有增益何以故佛說夢覺無差別  
故舍利子若菩薩摩訶薩已得般若波羅蜜  
多覺時修行甚深般若波羅蜜多既名安住

甚深般若波羅蜜多是菩薩摩訶薩夢中修  
行甚深般若波羅蜜多亦名安住甚深般若  
波羅蜜多三解脫門於深般若波羅蜜多能  
爲增益亦復如是若夢若覺義無缺減時舍  
利子問善現言若善男子善女人等夢中造  
業爲有增益或損減不善現答言佛說一切  
法皆如夢所見若夢造業無增減者覺時所  
造業亦應無增減然於夢中所造諸業無勝  
增減要至覺時憶想分別夢中所造乃令彼  
業成勝增減如人夢中斷他命已後至覺時  
憶想分別深自慶快其業便增若深悔愧其  
業便減時舍利子謂善現言有人覺時斷他

命已後至夢中或自慶快或深悔愧令覺時  
業有增減不善現報言亦有增減然彼增減  
不及覺時明了心中所作勝故時舍利子問  
善現言無所緣事若思若業俱不得生要有  
所緣思業方起夢中思業緣何而生善現答  
言如是如是若夢若覺無所緣事思業不生

夜十

七

要有所緣思業方起何以故舍利子要於見  
聞覺知法中有覺慧轉由斯起染或復起淨  
若無見聞覺知諸法無覺慧轉亦無染淨由  
此故知若夢若覺有所緣事思業乃至無所  
緣事思業不起時舍利子問善現言佛說所  
緣皆離自性如何可說有所緣事思業乃至

無所緣事思業不起善現答言雖諸思業及  
所緣事皆離自性而由自心取相分別世俗  
施設說有所緣由此所緣起諸思業如說無  
明爲緣生行行爲緣生識等皆由自心取相  
分別說有所緣非實有性時舍利子謂善現  
言若菩薩摩訶薩夢中行施施已迴向無上  
菩提是菩薩摩訶薩爲實以施迴向無上佛  
菩提不善現報言慈氏菩薩久已受得大菩  
提記一生所繫定當作佛善能酬答一切難  
問現在此會宜請問之補處慈尊定當爲答  
時舍利子如善現言恭敬請問慈氏菩薩時  
慈氏菩薩還語善現言尊者所言慈氏菩薩

能答此義何等名爲慈氏菩薩爲名能答爲  
色能答爲受想行識能答爲顯能答爲形能  
答爲色空能答爲受想行識空能答耶且慈  
氏名不能答色亦不能答受想行識亦不能  
答顯亦不能答形亦不能答色空亦不能答  
受想行識空亦不能答所以者我都不見  
有法能答有法所答答處答時及由此答皆  
亦不見我都不見有法能記有法所記記處  
記時及由此記皆亦不見何以故以一切法  
本性皆空都無所有無二無別畢竟推徵不  
可得故時舍利子問慈氏菩薩言仁者所說  
法爲如所證不慈氏菩薩摩訶薩言我所說

法非如所證所以者何我所證法不可說故  
又舍利子我都不見有所證法自性可得如  
心所思如言所說又舍利子諸法自性非身  
能觸非語能表非意能念何以故舍利子以  
一切法無自性故時舍利子作是念言慈氏  
菩薩覺慧甚深長夜修行甚深般若波羅蜜

夜十

多能如是說爾時佛告舍利子言汝心所念  
慈氏菩薩覺慧甚深長夜修行甚深般若波  
羅蜜多能如是說者舍利子如汝所念又舍  
利子於意云何汝由是法成阿羅漢爲見此  
法是可說不舍利子曰不也世尊佛告舍利  
子菩薩摩訶薩行深般若波羅蜜多所證法

性亦復如是不可宣說又舍利子是菩薩摩訶薩不作是念我由此法於佛無上正等菩提已得受記今得受記當得受記不作是念我由此法當證無上正等菩提若菩薩摩訶薩能如是行是行般若波羅蜜多若菩薩摩訶薩能如是行不生疑惑我於無上正等菩提爲得不得但作是念我勤精進定得無上正等菩提已於菩提得勝力故若菩薩摩訶薩能如是行是行般若波羅蜜多又舍利子諸菩薩摩訶薩行深般若波羅蜜多聞甚深法不驚不恐不怖不畏不沉不沒於得無上正等菩提亦無怖畏決定自知我當證故又

舍利子是諸菩薩若在曠野有惡獸處亦無  
怖畏所以者何是諸菩薩為欲饒益諸有情  
故能捨一切內外所有恒作是念若有惡鬼  
及惡獸等欲噉我身我當施與令其充足由  
此善根令我布施波羅蜜多速得圓滿疾近  
無上正等菩提我當如是勤修正行證得無  
上正等覺時我佛土中得無一切傍生餓鬼  
又舍利子是諸菩薩若在曠野有惡賊處亦  
無怖畏所以者何是諸菩薩為欲饒益諸有  
情故能捨一切內外所有樂修諸善於身命  
財無所顧悋恒作是念若諸有情競來劫奪  
我諸資具我當恭敬歡喜施與或有因斯害

摩十

九

我身命我終於彼不生瞋恨亦不發生身語  
意惡由此因緣令我布施淨戒安忍波羅蜜  
多速得圓滿疾近無上正等菩提我當如是  
勤修正行證得無上正等覺時我佛土中得  
無一切劫害怨賊由我佛土極清淨故亦無  
餘惡又舍利子是諸菩薩若在曠野無水之  
處亦無怖畏所以者何菩薩法亦無諸怖畏  
恒作是念我當求學斷諸有情渴愛之法不  
應於此而生怖畏設我由此渴乏命終於諸  
有情必不捨離大悲作意施妙法水奇哉薄  
福是諸有情居在如斯無水世界我當如是  
勤修正行證得無上正等覺時我佛土中得

無如是一切焦渴乏水曠野我當方便勸諸  
有情修勝福業隨所在處皆令具足八功德  
水我由如是堅猛精進方便教化一切有情  
由此因緣令我精進波羅蜜多速得圓滿疾  
近無上正等菩提又舍利子是諸菩薩在飢  
饑國亦無怖畏所以者何是諸菩薩被功德  
鎧勇猛精進嚴淨佛土作是願言當證無上  
正等覺時我佛土中得無如是一切飢饉諸  
有情類具足快樂隨意所湏應念即至如諸  
天上所念皆得我當發起堅猛精進令諸有  
情法願滿足一切時處一切有情於一切種  
命緣資具無所乏少又舍利子是諸菩薩遇

疾疫時亦無怖畏所以者何是諸菩薩恒審  
觀察無法名病亦無有法可名病者一切皆  
空不應怖畏我當如是勤修正行證得無上  
正等覺時我佛土中諸有情類得無一切災  
橫疾疫精進修行殊勝正行又舍利子是諸  
菩薩若念無上正等菩提經久乃得不應怖  
畏所以者何前際劫數雖有無量而一心頃  
憶念分別積集所成後際劫數應知亦亦是  
故菩薩不應於中生久遠想而謂無上正等  
菩提要經長時方乃證得便生怖畏何以故  
前際後際劫數長短皆一刹那心相應故如  
是舍利子菩薩摩訶薩雖聞經久乃證無上

夜十

十

正等菩提而於其中審諦觀察不生怖畏又  
舍利子若諸菩薩於餘一切見聞覺知可怖  
畏法不生怖畏應知速證所求無上正等菩  
提是故舍利子菩薩摩訶薩欲疾證得所求  
無上正等菩提應隨如來真淨空教被功德  
鎧精勤修學於一切法不應怖畏

第四分菟伽天品第二十

尔時會中有一天女名菟伽天從座而起瞽  
首佛足偏覆左肩右膝著地合掌向佛白言  
世尊我於是處亦無怖畏於諸法中亦無疑  
惑我未來世亦為有情說無怖畏無疑惑法  
尔時世尊即便微笑從面門出金色光明普

照十方無邊世界還來梵世現大神通漸至  
佛邊右遶三匝作神變已入佛頂中時苑伽  
天覩斯事已歡喜踊躍取妙金花恭敬至誠  
散如來上佛神力故令此金花上踊空中續  
紛而住時阿難隨見聞是已從座而起頂禮  
佛足偏覆左肩右膝著地合掌恭敬白言世

夜十

十一

尊何因何緣現此微笑佛現微笑非無因緣  
尔時世尊告慶喜曰今此天女於未來世當  
成如來應正等覺劫名星喻佛號金花慶喜  
當知今此天女即是最後所受女身捨此身  
已便受男身盡未來際不復爲女從此歿已  
生於東方不動如來可愛世界於彼佛所勤

修梵行此女彼男便字金花從不動佛世界  
歿已復生他方有佛世界從一佛國趣一佛  
國常不遠離諸佛世尊如轉輪王從一臺觀  
至一臺觀歡娛受樂乃至命終足不履地金  
花菩薩亦復如是從一佛土徃一佛土乃至  
無上正等菩提隨所生處常不離佛時阿難  
陀竊作是念金花菩薩當作佛時亦應宣說  
甚深般若波羅蜜多彼會菩薩摩訶薩衆其  
數多少應如今佛菩薩衆會佛知其念告慶  
喜言如是如是如汝所念金花菩薩當作佛  
時亦爲衆會宣說如是甚深般若波羅蜜多  
彼會菩薩摩訶薩衆其數多少亦如今佛菩

薩衆會慶喜當知金花菩薩當作佛時聲聞  
弟子得涅槃者其數甚多不可稱計謂不可  
數若百若干若俱胝等但可總說無量無邊  
慶喜當知金花菩薩當作佛時其土無有惡  
獸惡鬼亦無怨賊乏水飢饉疾疫等難慶喜  
當知金花菩薩當證無上正等覺時其土有  
情無諸怖畏及無種種災橫過失亦時慶喜  
復白佛言今此天女先於何佛初發無上正  
等覺心種諸善根迴向發願佛告慶喜今此  
天女先於過去然燈佛所初發無上正等覺  
心種諸善根迴向發願亦以金花散佛  
求證無上正等菩提慶喜當知我於過去然

燈佛所以五莖華奉散彼佛迴向發願尔時  
便得無生法忍然燈如來應正等覺知我根  
熟與我受記汝於來世當得作佛號曰能寂  
界名堪忍劫號為賢天女尔時聞佛授我大  
菩提記歡喜踊躍即以金華奉散佛上便發  
無上正等覺心種諸善根迴向發願使我來

夜十

十二

世於此菩薩當作佛時亦如今佛現前授我  
大菩提記故我今者與彼受記尔時慶喜聞  
佛所說歡喜踊躍復白佛言今此天女以發  
無上正等覺心種諸善根迴向發願今得成  
熟是故如來授與彼記佛告慶喜如是如是  
如汝所說彼善根熟故我授彼大菩提記

第四分覺魔事品第二十一之一

尔時善現便白佛言行深般若波羅蜜多諸  
菩薩摩訶薩云何習空云何現入空三摩地  
佛告善現若菩薩摩訶薩行深般若波羅蜜  
多應觀色空應觀受想行識空作此觀時不  
令心亂若心不亂則不見法若不見法則不  
作證尔時善現便白佛言如世尊說諸菩薩  
摩訶薩行深般若波羅蜜多應觀法空而不  
作證云何菩薩摩訶薩行深般若波羅蜜多  
時住空等持而不作證佛告善現諸菩薩摩  
訶薩行深般若波羅蜜多觀法空時先作是  
念我應觀法諸相皆空不應作證我為學故

觀諸法空不為證故觀諸法空今是學時非  
為證時是菩薩摩訶薩未入定時繫心於境  
攝受般若波羅蜜多非入定位繫心於境攝  
受般若波羅蜜多是菩薩摩訶薩於如是時  
不退一切菩提分法不證漏盡所以者何是  
菩薩摩訶薩成就如是廣大智慧善住法空

夜十

十三

及一切種菩提分法恒作是念今時應學不  
應作證善現當知若時菩薩摩訶薩住空三  
摩地而不證空是時菩薩摩訶薩亦住無相  
三摩地而不證無相所以者何是菩薩摩訶  
薩成就殊勝堅淨善根常作是念今時應學  
不應作證今應攝受甚深般若波羅蜜多於

一切法觀空無相圓滿一切菩提分法不應  
今時證於實際由此因緣是菩薩摩訶薩不  
墮聲聞及獨覺地疾證無上正等菩提善現  
譬如有人勇健威猛所立堅固難可動搖形  
色端嚴衆人喜見具多最勝功德尸羅聰慧  
巧言善能酬對具辯具行知處知時於兵技  
術學至究竟所防堅固能摧多敵一切技能  
皆善成就諸工巧處學至窮盡具念慧行勇  
悍儀式於諸經典得無所畏具慈具義有大  
勢力支體無缺諸根圓滿眷屬資財無不具  
足衆人敬伏悉皆欽仰諸有所爲皆能成辦  
善事業故功少利多由此因緣富諸財寶善

能給施多品有情應供養者能供養之應恭敬者能恭敬之應尊重者能尊重之應讚歎者能讚歎之善現於意云何彼人由此倍增喜躍深心歡悅自慶慰不善現對曰如是世尊如是善逝佛告善現彼勇健人成就如是大興盛事有因緣故將其父母妻子眷屬發趣他方中路經過險難曠野其中多有惡獸怨賊怨家潛伏諸怖畏事眷屬小大無不驚惶其人自恃多諸伎術威猛勇健身意泰然安慰父母妻子眷屬勿有憂懼必令無苦疾瘳曠野至安隱處復次善現於意云何此曠野中怨害現起彼人既具勇健技能慈愛尊

親備諸器仗而棄父母妻子眷屬獨運自身  
度險難不善現對曰不也世尊所以者何彼  
多技術能於曠野化作兵仗勇健精銳遇諸  
怨敵令彼見之自然退散而捨親愛獨運自  
身度險曠野無有是處然彼壯士於曠野中  
惡獸怨賊無加害意所以者何自恃威猛具

夜十

十四

諸技術無怖畏故世尊彼人以善巧術將諸  
眷屬度險曠野無所損害必至村城或大王  
都安樂之處佛告善現諸菩薩摩訶薩亦復  
如是愍生死苦諸有情類繫念安住慈悲喜  
捨攝受般若波羅蜜多殊勝善根方便善巧  
如佛所說持諸功德迴向無上正等菩提雖

具修空無相無願而於實際無作證心勿墮  
聲聞及獨覺地所以者何是諸菩薩具大勢  
力精進堅固攝受般若波羅蜜多殊勝善根  
方便善巧誓不棄捨一切有情由此定能安  
隱無難速證無上正等菩提善現當知若時  
菩薩慈心愍念一切有情緣諸有情欲施安  
樂是時菩薩超煩惱品亦超魔品及二乘地  
雖住三摩地而不至漏盡雖善習空而不作  
證善現當知若時菩薩能善安住空解脫門  
是時菩薩於無相定亦能安住而於其中方  
便善巧不證無相由此因緣超二乘地必趣  
無上正等菩提善現當知如堅翅鳥飛騰虛

空自在翱翔又不墮落雖依空戲而不住空亦不爲空之所拘礙應知菩薩亦復如是雖習空無相無願解脫門而不住空無相無願乃至佛法未極圓滿終不依彼求盡諸漏善現當知如有壯夫善閑射術欲顯己技仰射虛空爲令空中箭不墮地復以後箭射前箭

夜十

十五

栝如是展轉經於多時箭箭相承不令其墮若欲令墮便止後箭尅時諸箭方頓墮落應知菩薩亦復如是行深般若波羅蜜多攝受殊勝方便善巧乃至無上正等菩提因行善根未皆成熟終不中道證於實際若時無上正等菩提因行善根一切成熟尅時菩薩方

證實際便得無上正等菩提是故善現諸菩  
薩摩訶薩行深般若波羅蜜多攝受殊勝方  
便善巧皆應如是於深法性審諦觀察若諸  
佛法未極圓滿不應作證亦時善現便白佛  
言諸菩薩摩訶薩甚爲希有能爲難事謂雖  
行空而不住空雖現入空定而不證實際佛  
告善現如是如是如汝所說所以者何是諸  
菩薩於有情類誓不棄捨謂發如是殊勝妙  
願若諸有情未得解脫我終不捨加行善根  
善現當知是諸菩薩由起如是廣大心故爲  
欲解脫一切有情雖引發空無相無願三三  
摩地而由攝受方便善巧不證實際所以者

何是諸菩薩方便善巧所護持故常作是念  
我終不捨一切有情而趣圓寂由起此念方  
便善巧故於中間不證實際復次善現若諸  
菩薩於甚深處或已觀察或當觀察謂空無  
相無願等持三解脫門所行之處是諸菩薩  
恒作是念有情長夜起有情想行有所得引

生種種邪惡見趣輪迴生死受苦無窮我爲  
斷彼邪惡見趣應求無上正等菩提爲諸有  
情說深空法令斷彼執出生死苦是故雖學  
空解脫門而於中間不證實際善現當知是  
諸菩薩由起此念方便善巧雖於中間不證  
實際而不退失四無量定所以者何是諸菩

薩甚深般若波羅蜜多方便善巧所攝受故  
倍增白法諸根漸利力覺道支轉復增益復  
次善現是諸菩薩恒作是念有情長夜行諸  
相中起種種執由斯輪轉受苦無窮我為斷  
彼諸相執故應求無上正等菩提為諸有情  
說無相法令斷相執出生死苦由斯數入無

夜十

十六

相等持善現當知是諸菩薩由先成就方便  
善巧及所起念雖數現入無相等持而於中  
間不證實際雖於中間不證實際而不退失  
慈悲喜捨及諸餘定所以者何是諸菩薩甚  
深般若波羅蜜多方便善巧所攝受故倍增  
白法諸根漸利力覺道支轉復增益復次善

現是諸菩薩恒作是念有情長夜其心常起  
常想樂想我想淨想由此引生顛倒執著輪  
迴生死受苦無窮我爲斷彼四顛倒故應求  
無上正等菩提爲諸有情說無倒法謂說生  
死無常無樂無我無淨唯有涅槃微妙寂靜  
具足種種真實功德由斯數入無願等持善  
現當知是諸菩薩由先成就方便善巧及所  
起念雖數現入無願等持而諸佛法未極圓  
滿終不中間證於實際雖於中間不證實際  
而不退失慈悲喜捨及諸餘定所以者何是  
諸菩薩甚深般若波羅蜜多方便善巧所攝  
受故倍增白法諸根漸利力覺道支轉復增

益復次善現是諸菩薩恒作是念有情長夜  
先已行有所得今亦行有所得先已行有相  
今亦行有相先已行顛倒今亦行顛倒先已  
行和合想今亦行和合想先已行虛妄想今  
亦行虛妄想先已行邪見今亦行邪見由斯  
輪轉受苦無窮我爲斷彼如是過失應求無  
上正等菩提爲諸有情說甚深法令彼過失  
皆永斷除不復輪迴受生死苦速證常樂真  
淨涅槃善現當知是諸菩薩由深愍念一切  
有情成就殊勝方便善巧甚深般若波羅蜜  
多所攝受故於深法性常樂觀察謂空無相  
無願無作無生無滅無起無盡無性實際善

現當知是諸菩薩成就如是殊勝智見若墮  
無相無作之法或住三界俱無是處善現當  
知是諸菩薩成就如是殊勝功德捨諸有情  
而趣圓寂不證無上正等菩提饒益有情定  
無是處

十七末

大般若波羅蜜多經卷第五百五十

夜十

